



**Likar nye-namnet:** Frå årsskiftet har NLM-barnehage Tryggheim Ulsteinvik blitt bytta ut med Preg barnehager Ulsteinvik. – Vi har blitt veldig glade i den nye profilen og visjonen, seier styrar Berit-Mari Nilssen Nystøyl. FOTO: OLE-OTTAR KARLSEN HØGSTAVOLL.

● Namnebyte for tradisjonsrik Ulsteinvik-barnehage:

# – Veldig passande namn

1. januar bytte NLM-barnehage Tryggheim Ulsteinvik namn til Preg barnehager Ulsteinvik.

– Det er klart vi kjem til å sakne Tryggheim-namnet. Det har vi hatt sidan barnehagen opna dørene i 1976, og mange av oss har jobba her i mange år. Men, Preg er eit veldig fint og passande nytt namn å organisere Misjonssambandet sine barnehagar under. Vi har blitt veldig glade i den nye profilen og visjonen, seier styrar Berit-Mari Nilssen Nystøyl i Preg barnehager Ulsteinvik til Vikebladet Vestposten.

Styraren har sjølv vore tilsett i barnehagen sidan 1993, berre med eitt års avbrekk.

Misjonssambandet sine 38 barnehagar kring om i Norge har fram til no vore organisert under namnet NLM-barnehagane. Når organisasjonen no har bytta namn til Preg barnehager, vil alle barnehagane heite Preg barnehager – kombinert med den enkelte barnehagen sitt eige stadnamn. Det går fram av ei pressemelding frå Misjons-

sambandet og Preg barnehager.

## Heng saman med visjonen

Dette avsluttar ein lengre prosess som har gått føre seg over fleire år, der både namnet og visjonen er fornya.

– Preg har samla seg om visjonen «sammen om å sette verdifulle spor». Det var utgangspunktet for det nye namnet, og det er veldig passande, seier Berit-Mari Nilssen Nystøyl.

Margrethe Thomassen, som har leia prosjektet med å gje konsernet ein ny profil og som er nestleiar i Preg barnehager, fortel at ein ville ha eit namn som sa noko om kven dei var og kva dei står for.

– For nokon kan NLM vere framand. Namnet fortel kva vi gjer – vi set verdifulle spor, og det pregar borna. Det er eit namn som heng saman med visjonen, seier Thomassen.

## – Meir tidsriktig drakt

Endringane har ifølgje Margrethe Thomassen skapt både begeistring og engasjement.

– Vi er stolte over å kunne ta i bruk vårt nye namn og vår nye



**Kristen barnehage:** Den tradisjonsrike barnehagen på Rognahaugen i Ulsteinvik opna dørene i 1976. Barnehagen har ein kristen profil. FOTO: OLE-OTTAR KARLSEN HØGSTAVOLL.

profil no, seier ho.

Styraren i Ulsteinvik-barnehagen trur at endringa vil skape positive effektar også lokalt.

– Vi trur at denne endringa vil bidra til ei større forståing for

kva vi ønsker å vere som barnehage, seier Berit-Mari Nilssen Nystøyl.

Avslutningsvis seier Margrethe Thomassen at barnehagane framleis har det same innhal-

det, tilsette, verdiane, kvalitetane og eigarane.

– Men, vi har både fått nytt namn og ei meir tidsriktig drakt.

**OLE-OTTAR KARLSEN HØGSTAVOLL**  
ole.ottar@vikebladet.no